

Aruba y Hulanda ta discuti acuerdo di aviacion

ORANJESTAD(AAN)—E Ministro Arubano di Trafico y Comunicacion, Mr. A. Bermudez, no ta mucho optimista encuanto e resultadonan di e consulta cu a cuminsa ayera entre Aruba y Hulanda encuanto e politica pa aviacion.

E conversacionnan, ariba nivel di ambtenaar, mester conduci na un

protocol pa aviacion entre e dos partinan di Reino.

Segun un relato di ANP, Ministro Bermudez a declara cu e tin e impresion cu e delegacion Hulandes ta posiciona su mes poco flexible y ta laga e interesnan di KLM pisa mas cu esnan di Aruba.

"Lo mi no keda asombrado si nada sali for di e conversacionnan, ya cu

nan ta sigui insisti ariba e posicion especial pa KLM, cu nan ta basa mas ariba e relacionnan especial den Reino entre Aruba y Hulanda. Semper mi tabata tin e impresion cu un apelacion ariba e relacion especial ta contene pa nos un limitacion", asina Bermudez a bisa.

E gobernante Arubano na November di aña pasa ya tabata na Hulanda pa

papia di e asunto. E tempo ainda no por a yega na un acuerdo.

Segun Bermudez e problema principal ta e exigencia di Hulanda pa haya tur cos di bisa encuanto determinacion di tarificanan ariba e linea Amsterdam-Aruba y e rechazo continuo di parti di Hulanda pa den e protocolo yega na acuerdonan encuanto charters entre e dos

paisnan.

Especialmente e ultimo punto ta algo importante pa Aruba.

Di parti di Hulanda ta worde bisa cu e vuelonan di KLM por acomoda e demanda pa capacidad, awor y den futuro.

Aruba kier haci uso di posibilidad di charter awor cu tur esfuerso ta dirigi ariba expansion di industria di turismo.

Charro Kelly

Gobierno a paga 6 biaha e valor di hotel Colombia

ORANJESTAD(AAN)—Durante un entrevista cu ex Ministro di Obras Publico, Charro Kelly, el a manifesta cu e no tin arte ni parte den e decision pa compra di hotel Colombia.

Segun Kelly, dia 9 di Januari 1987 ariba proposicion di Promer Ministro Eman, Consejo di Ministro a dicidi di pidi e como Ministro di Obras Publico pa consulta cu doño di e edificio cu tabata hotel Colombia y e doñonan di e edificionan den vecindario si nan ta di acuerdo pa bende e tereno cu Gobierno pa asina acomoda Universidad di Antiyas.

A base di decision di Consejo di Ministro, dia 19 di Januari 1987, hefe di Domeinbeheer a combersa cu Eloy Arends, di hotel Colombia. E combersacion aki e

hefe di Domeinbeheer segun Kelly, a pone den un carta y manda esaki pa Eloy Arends dia 21 di Januari 1987.

Segun Kelly, den e carta ta para cu Arends a duna di conoce cu e ta dispuesto pa papia ariba venta di e edificio pa 1000 Florin pa meter cuadra.

Charro Kelly a manda copia di e carta pa Consejo di Ministro. Den e reunion di Consejo di Ministro cual a tuma lugar na comienso di Februari Kelly a recomenda e Ministronan cu e prijs ta haltu. Consejo di Ministro a dicidi cu e carta ta worde tuma como informacion y lo no continua cu negociacion.

Kelly a manifesta cu te cu dia cu el a baha como Ministro, e no ta al tanto di ningun reaccion mas di parti Arends.

Kelly a enfatisa cu absolutamente e no tin ni arte ni parte den e decision pa compra e edificionan pa tal prijs.

Ultimo lunanan Gobierno a hiba un politica intensivamente pa muda oficinanan di Gobierno pa San Nicolas. Recientemente Ministronan a bisa cu nan a yega na un acuerdo cu Lago y cu hopi edificio a worde traspasa. Kelly ta puntra pakico Gobierno ta compra tereno den e temponan aki pa traha un edificio nobo pa Bevolking mientras cu tin edificionan disponible na Lago. Awor

si Bevolking debi na e caracter di su trabao no por bay San Nicolas ta muda otro departamento y acomoda Bevolking.

Kelly a bisa cu Gobierno ta bula ariba dos pensamiento: 1) mester espacio

pa Staten y pesey mester busca lugar pa Bevolking; 2) mester conserva e edificionan aki pa e valor historico.


Pa loke ta trata edificio historico Kelly a bisa cu segun registro di cadaster, e parkeerplaats pariba di e

edificio a worde compra pa menos di 400 Florin o meter cuadra.

Gobierno a paga 6 biaha mas tanto cu loke DOW a balora e edificio.

Segun Kelly tin algo cu no ta cuadra.

Mester pone borchchi di aviso na tereno di aeropuerto



ORANJESTAD(AAN)—Mester pone borchchinan na un forma sumamente visible canto di lamar pa asina muestra esnan cu ta cana den vecindario ariba e peligro cu ta acompaña esnan cu subi tereno di aeropuerto. E borchchi cu tin actualmente, no ta suficiente cla ni grandi, pa e por worde mira for di un distancia.

Afortunadamente personal di tore di control den mayoria di caso ta tuma nota di personanan

cu ta subi tereno di aeropuerto. Central di Seguridad di Aeropuerto mes no tin ningun vista claro ariba e pista completo y tereno completo di aeropuerto y ta di vital importancia pa introduci un mehoracion den e situacion.

Lo ta e intencion pa bay acomoda personal di seguridad na un piso mas alto pa asina nan tin mihor vista ariba loke ta pasa ariba e tereno di aeropuerto.

E maniobra di juvennan cu kier a bay tira yuana

ariba tereno di aeropuerto tabata uno cu por a resulta sumamente peligroso no solamente pa nan persona, pero tambe pa esnan a bordo di avionnan cu ta yega.

Ta sumamente peligroso ora un piloto worde sorprendi pa presencia di un persona den vecindario directo di pista di aterzaje.

Medidanan estricto di seguridad mester worde tuma mas pronto cu ta posible na e sitio.

Alf ta bini Aruba

ORANJESTAD(AAN)—Su expresion: "No hay problema" a bira hopi popular na Aruba.

Awor, segun informacion cu a alcanza DIARIO, Alf mes lo realiza un bishita na Aruba.

Lo ta e intencion pa Hotel Concord invita Alf pa presenta su mes na publico na Aruba, caminda el a bira popular atravez di su programa di television. Especialmente cerca juvennan e ta hopi popular.